

廣雅疏證補正

訓詁之學至乾嘉而極盛而高郵王氏金壇段氏棲霞郝氏尤爲賈絕段氏所著說文解字體大思精而小誤未免後人之作勘誤補正者不一家郝氏爾雅義疏亦小有疏漏之處兒時點勘是書於釋詁釋言釋訓三篇頗以鄙見爲之補正雖管蠡之窺無裨宏巨然可見訓詁之學雖極精邃而絕無罅漏之難也獨王石臞先生廣雅疏證精審密緻殆勝二家據先生自序言殫精極慮十年於茲蓋刪定董理匪伊朝夕矣庚子秋太嫻丈黃先生惠伯出廣雅疏證補正見示蓋成書後先生自校正勘補者益歎前輩之虛衷求歎至此黃先生旣爲條寫擬授之梓以公海內敬綴數語以識先生嘉惠後學之盛心竝記古人著書慎

重之不苟云爾光緒庚子九月上虞羅振玉

廣雅疏證補正

自序 凡字之譌者五百八十改五百七十八 脫者四

百九十改四百九十一

上廣雅表注 乙神仙傳下二十六字改爾雅釋訓釋文
引張揖雜字云訓者謂字有意義也襄二十九年穀梁
傳云此致君之意義也 乙後漢書曹褒傳下十九字
改臧氏在東曰張稚讓言叔孫通撰置禮記不違爾雅
然則大戴禮記中當有爾雅數篇爲叔孫氏所取入故
白虎通義引禮親屬記男子先生稱兄後生稱弟女子
先生爲姊後生爲妹文出釋親風俗通義引禮樂記大
者謂之產其中謂之仲小者謂之笄文出釋樂公羊宣

十二年注引禮天子造舟諸侯維舟卿大夫方舟士特舟文出釋水孟子帝館甥于貳室趙注引禮記妻父曰外舅謂我舅者吾謂之甥文出釋親則禮記中之有爾雅信矣

卷第一上

釋詁

業始也 業猶創也下補莊子秋水篇云將忘子之故失子之業

令龍君也 令君也下補韓子初見秦篇云立社稷主置宗廟令 乙賈子下十四字改呂氏春秋介立篇注云龍君也

方旁袞大也 乙堯典云下二十字改墨子非攻篇云其
土之方未至有數百里也人民之衆未至有數十萬也
方大也下補楚策方船積粟史記張儀傳方作大是
方與大同義 墨籤云逸周書世俘解旁生魄孔晁注
云旁廣大月大時也 乙後漢書下十二字改呂氏春
秋大樂篇注云渾讀如袞冕之袞

仁虞有也 墨籤云廣韻倅則卧切有也仁字疑倅字之
譌一切經音義三引白虎通虞樂言天下之民皆有樂
也

抵薦至也 抵雲陽下補河渠書自中山西邸瓠口爲渠
氏邸竝與 抵與氏通乙與氏二字 義竝與抵通改

義亦與抵同 臻至也下補藝文類聚引書大傳云薦至也

乃管廷往也 是乃爲往也下補阮籍爲鄭冲勸晉王牋
聖上覽乃管以來禮典舊章乃管謂往管也 聲竝相
近下補楚語左史倚相廷見申公子亶章昭注云廷見
見於廷也長子引之云下文云子亶不出則在家非在
朝也不得言廷見廷當爲廷廷往也謂往至子亶之家
而請見故下文云子亶不出也下文又云闕且廷見令
尹子常廷亦廷之譌

黨散善也 作美言下補改管子霸形篇云仲父益不當
言黨黨當昌竝聲近而義同 慤謹也下補祭義云慤

善不違身

聆從也 古通作令下補商子算地篇云故國有不服之
民主有不令之臣 爲欲篇下補云

悌倫順也 乙孝經下三十三字補孟子滕文公篇注云
悌順也荀子修身篇云端慤順弟弟與悌同 倫之言
順也下補莊子天運篇云夫至樂者一盛一衰文武倫
經謂順其經也

容類梭癭也 與鍾會同下補太元中次三首尾信可以
爲庸范望注云庸法也庸與容通 拱揀者下乙長子
二字 墨籤云太元毅次七觥羊之毅鳴不類測曰觥
羊之毅言不法也 謂之梭頭是也下補梭猶憲也管

子宙合篇云迹求履之憲憲援語之轉耳

期頤老也 養道而已下補古辭滿歌行百年保此期頤亦以期頤二字連讀

款誠也 乙楚辭下十五字改荀子脩身篇云愚款端慤厲方也 其義一也下補故魏風伐檀篇寘之河之側兮傳云側猶厓也毛

榦正也 貞正也下補文選西京賦注引薛君韓詩章句云榦正也 乙云榦正也四字改與薛君同

愾臆滿也 乙謂氣滿也四字 乙說文釳怒戰也下五十八字改哀公問君行此三者則愾乎天下矣鄭注云愾猶至也家語大婚解與此同王肅注云愾滿也案愾

訓爲滿於義爲長行此三者則愾乎天下猶孔子閒居
言致五至而行三無以橫於天下也 乙說文十萬曰
億下百五十五字改小雅楚茨篇我倉既盈我庾維億
億盈亦語之轉也易林乾之師云倉盈庾億漢巴郡太
守樊敏碑云持滿億盈是億卽盈也我黍與與我稷翼
翼翼猶與與也我倉既盈我庾維億維億猶既盈也
此億字但取盈滿之義而非紀其數與萬億及秭之億
不同傳以萬萬爲億箋以十萬爲億皆失之襄二十五
年左傳今陳介恃楚眾以馮陵我做邑不可億逞億逞
卽億盈言其欲不可滿盈也文十八年傳云侵欲崇侈
不可盈厭意與此同盈與逞古同聲而通用左氏春秋

昭二十三年沈子逞穀梁作沈子盈左氏傳樂盈史記
作樂逞又左氏傳昭四年逞其心以厚其毒新序善謀
篇逞作盈皆其證也杜注訓億爲度逞爲盡皆失之漢
書賈誼傳眾人惑惑好惡積意意者滿也言好惡積滿
於中也李奇云所好所惡積之萬億薛瓚云眾懷好惡
積之心意皆失之

極遠也 極遠也下補史記三王世家云極臨北海

隱安也 據定也下補漢析里橋郁閣頌云改解危殆卽
便求隱

畏亟敬也 畏者下補鄭注曲禮云心服曰畏孟子公孫
丑篇云吾先子之所畏也 謹重兒下補漢成陽靈臺

碑云齊革精誠 亟極下補革

要棄也 乙子往矣下七字 乏廢也下補僖十年左傳

云失刑乏祀

從隨駕行也 今俱訂正下補從者夏小正齊人不從傳
云不從者弗行 逸然而往下補隨者皋陶謨隨山刊
木史記夏本紀隨作行 駕者下補張注漢書司馬相
如傳云駕行也 乙是駕爲行也五字

疥癩邛疔痲病也 與疔通疥下補義見下條 乙讀爲

痲下八十七字 乙巧言篇下七字 乙鄭箋竝三字

邛病也下補韓詩外傳云詩曰匪其止其惟王之邛
言不共其職事而病其主也 小腹痛也改心腹痛也

乙玉篇云下七字 今據以訂正下補凡隸書從寸之字或書作木故疔字或作疔因譌而爲疔漢衛尉衡方碑遵尹鐸之渠導字作渠廣雅釋言篇刂切也刂字作利是其例也 女病也改取也

乘式也 墨籤云方言六之五物無耦曰特嘗無耦曰介飛鳥曰隻鴈曰乘管子地員篇二有三分而去其乘尹知章注乘三分之一也揚雄解嘲乘鴈集不爲之多隻鳧飛不爲之少 乙管子形勢篇下三十字

將陶旅養也 乙淮南子原道訓下十三字改墨子尙賢篇云倉饑息勞將養其萬民 秦曰陶下補太元元攤資陶虛無而生乎規範望注云陶養也旅者漢書武帝

紀云旅耆老復孝敬旅耆老卽王制所謂養耆老也顏師古注云加惠於耆老之人若賓旅失之

哀也 乙檀弓下十四字改樂記肆直而慈愛者鄭注云愛或爲哀

擣酥攪拊取也 擣取也下補漢竹邑侯相張壽碑云略涉傳記矯取其用矯與擣通 歛之也下補管子法禁篇云漁利蘇功 乙史記淮陰侯傳下二十二字 取物曰擣下補墨子天志篇云踰人之牆垣担格人之子女 是其證矣下補大戴禮禮察篇人主胡不承殷周秦事以觀之乎承取也漢書賈誼傳承作引引亦取也故晉語引黨以封已韋昭注云引取也

婦極也 墨籤云呂刑人極于病

恻怛憂也 與恻同下補賈子容經篇云喪紀之容恻然

懾然若不還 愁貌也下補太元內次三坎我西階范

望注云坎憂也 飲與怛通改飲坎竝與怛通

圻分也圻改折下補注圻字 乙圻各本譌下四十四字

改折者鄉飲酒禮乃設折俎鄭注云牲體枝解節折在

俎少儀以牛左肩臠折九个注云折斷分之也楚辭

九章令五帝以折中兮王注云折猶分也 與斑通下

補圻者說文圻裂也解釋文引廣雅圻分也眾經音義

卷一卷六卷十七引廣雅竝與釋文同今本脫圻字

廢壞也 損也下補淮南子說山訓云比干以忠靡其體

佻搖疾也

幼而佻齊佻疾均改作佻 九章下補云

而橫奔兮下補淮南子原道訓云疾而不搖

沃美也

注云沃美也下補襄二十五年左傳注云衍沃

平美之地

敵輩也

謂之臺敵下乙耦也二字

怵慙也

無所疑恁下補莊子讓王篇行脩於內者無位

而不作

卷第一下

釋詁

愆慙勸也

聳獎也下補獎與將古字通故方言作將史

記衡山王傳日夜從容勸之漢書作將着將着卽愆慙

之轉

僮臣也 微名也改徵召也

媯嬰好也 卽好君何尤下補呂氏春秋適威篇民善之

則畜也不善則讎也高誘注云畜好也 乙秦晉謂細

要曰嬰七字

蜺毳解也 乙毳毳下六字補矣 掎脫也下補改論衡

道虐篇云龜之解甲蛇之脫皮鹿之墮角隋掎墮義竝

與毳相近

駮強也 駮同也下補說文伎很也莊子齊物論篇大勇

不伎伎與駮亦聲近義同

孺生也 孚乳而生也下補大荒東經云東海之外大壑

少昇孺帝顓頊于此

福盈也 亦傳寫誤也下補韓詩外傳福乎天地之間者德也謂盈乎天地之間也今本福字亦誤從示

譔發隱度也 得原下補韓子主道篇云掩其跡匿其端下不能原 乙隱心下七字改注 乙郭璞下七字改管子禁藏篇下觀不及者以自隱也郭璞尹知章注竝與劉熙同

指語也 眉上有墨籤云指王翳曰此項王也

祕勞也 無勞于憂下補改又天闕誌我成功所漢書翟方進傳誌作勞誌與祕通

過賈也 督過之也下補引之云商頌殷武篇勿子禍適

子猶施也。禍讀爲過。適與謫通。勿子過謫謂不施譴責也。史記吳王濞傳云：賊臣鼂鐸擅過諸侯，是過適皆責也。禍與過古字通。荀子成相篇說刑云：罪禍有律，莫得輕重。罪禍卽罪過也。

目診視也。乙史記項羽紀下十二字改宜十二年左傳云：日子智井而拯之。乙史記扁鵲傳下十一字改楚辭九懷乃自診兮在茲。王逸注云：徐自省視至此處也。迟曲也。墨籤云：漢書韓長孺傳延尉當恢迟，橈當斬服。虔曰：迟音企，應劭曰：迟曲行避敵也。橈，顧望也。軍法語也。又籤云：同查明板漢書史記皆作逗橈，注皆引音豆之說。

貢上也 義亦相近下補貢亦謂自下而上也漢郎中鄭
固碑貢計王庭謂上計也泰山都尉孔宙碑貢登王室
謂上登也涼州刺史魏元丕碑貢躡帝字謂上躡也

休喜也 休喜也下補楚語云教之世而爲之昭明德而
廢幽昏焉以休懼其動 爲美失之下補引之云吕刑
云雖畏勿畏雖休勿休謂雖喜勿喜也休與畏正相反
傳訓休爲美亦失之

歸虞侯望也 乙莊子讓王篇下十七字改管子君臣篇
云上下相希若望參表 乙虞侯皆訓下四十七字

隋清急也 隋峻也下補韓詩外傳云故吳起峭刑而車
裂商鞅峻法而支解 乙王褒下十六字 激清也下

補莊子齊物論篇廉清而不信郭象注云激然廉清貪
名者耳非真廉也

糾擔舉也 糾者下補周官鄰長掌相糾相受注云相糾
相舉察 乙管子七法篇下二十二字

馳益也 與駢通下補地曹憲音弋鼓反 乙義與地同
四字改補施與地通地又爲饒益之益郊特性云順成
之方其蟠乃通以移民也鄭注云移之言羨也釋文移
以鼓反移亦與地通羨者饒益之意正與上文謹民財
相對正義以爲使民欲羨失其指矣

捐衝動也 掉搖也下補文選長笛賦織末奮箛李善注
引方言云捐動也箛與捐同 乙釋訓云衝衝行也七

字改易是類謀萌之衝鄭注云萌之始動 皆動貌也
皆改亦

制折也 卽折獄也下補呂刑制以刑墨子尙同篇制作
折 爲政篇改顏淵篇

媚妬也 墨籤云逸周書祭公篇女無以雙御固莊后緇
衣固作疾

根引也 前卻爲根格下補太元元圖云寅贊柔微拔根
于元

卷第二上

釋詁

容問也容改資 乙容各本訛作下九字改資卽容字也

表記事君先資其言鄭注云資謀也周語事莫若咨賈子禮容語篇作資是咨資古通用

扣剝裂也 通作滅矣下補扣者荀子議兵篇云君臣上下之間滑然有離德滑與扣通 卽破裂也下補荀子

議兵篇云霍然離耳

愁恚也 上下相恚也下補淮南子詮言訓云已之所生乃反愁人

馮怒也 通作馮也下補故史記田完世家之韓馮韓策作韓朋

魑息也 墨籤云思元賦姑純懿之所廬

煬爨也 墨籤云燎之方揚谷永傳作陽漢書叙傳炎炎

燎火亦允不揚

延徧也 乙吕刑云下十二字改漢書禮樂志郊祀歌炳
管蕭延四方謂馨香徧達於四方也

於落屍也 乙於與居聲相近六字改賈子大政篇云居
官之道不過於居家故不肖者之於家也不可以居官
是於與居同義故序卦傳物不可以久居其所晁說之
云鄭作物不可以終久於其所 乙落亦聚也下二十
字改列女傳賢明傳云一年成落三年成聚

役助也 役者下補周官壘氏遂役之鄭注云役之使助
之 少儀云乙云字 鄭注云乙鄭字

搯插也 眉批云漢書崩通傳云將爭接刃於公之腹

插衽改捷衽 插雷扱捷下補接

少小也 乙說文秦晉下九字 髮少小也少改少

尋長也 凡物長謂之尋下補漢李尋字子長

怒健也 以當車轍下補史記虞卿傳云天下將因秦之
彊怒乘趙之弊

讀說也 謂說之也說改道下補莊子則陽篇云今計物
之數不止於萬而期曰萬物者以數之多者號而讀之
也

卷第二下

釋詁

澌澌也 澌澌也下補秦策簡練以爲揣摩高注云筋次

也簡與漚同

且偕也 乙檀弓下二十四字改隱元年公羊傳且如桓

立何休注云且如假設之辭 何氏隱義改音義隱

踪稅也 南蠻賦也下補晉書李特載記云巴人呼賦爲

寶

罷歸也 左傳云乙云字 布路而罷下補謂分散而歸

也吳語遠者罷而未至韋昭注云罷歸也

幔覆也 幔幕也幕改悞

遽懼也 乙遽謂惶遽也五字改遽者襄三十一年左傳

注云遽畏懼也

疲嬾也 疲嬾也下補卽今俗語所謂疲玩也 有似於

罷下補齊語云罷士無伍罷女無家

淋瀝也 下也義竝相近下補漢李翕析里橋郿閣頌云

涉秋霖灑霖與淋同淋漓猶瀧灑語之轉耳

礪裔習也 乙後漢書下二十九字補漢書武帝紀怵於

邪說怵一本作怵服虔云怵音裔應劭云狃怵也 乙

釋言二字 乙釋詁下十二字

待也 跂止也下下補素問脈要精微論數動一代王冰

注云代止也代與待亦聲近而義同

既失也 義相近下補史記太史公自序云不既信不倍

言是既爲失也

子子短也 檝謂之枳枳改代

隋俄筮險衰也 隋衰也下補漢李翕析里橋邨閣頌說

邨閣之狀云緣崖鑿石處隱定柱臨澗長淵三百餘丈
蓋閣傾衰不平因謂之邨閣矣邨與隋同 亦是傾衰
之意下補大戴禮千乘篇說司寇治民煩亂之事云作
於財賄六畜五穀曰盜誘居室家有君子曰義子女專
曰媿飭五兵及木石曰賊以中情出小曰閔大曰諜利
辭以亂屬曰譏以財投長曰貸以上八者皆寇賊姦宄
之事義卽鳴義姦宄之義也 乙昭三十一年下三十
五字 說文差貳也貳改貳 皆傾衰之義也下補荀
子性惡篇云人無師法則偏險而不正

遁欺也 遁者下補管子法禁篇云遁上而遁民者聖王

之禁也

遊俠也 遊俠論改武帝紀

精論也 誦論也下補精者微之論也凡約言大要謂之
粗略討論祕旨謂之精微漢小黃門譙敏碑云漢明興
隲讖錄圖緯能精微天意精微卽講論之意故漢人講
學處謂之精舍後漢書黨錮傳劉淑隱居立精舍講授
諸生是也

卷第三上

釋詁

際餘也 殘帛也下補又云牝際裂也

拉探飛也 趁趨拉探下補漢鏡歌思悲翁篇云拉沓高

飛暮安宿

歛穿也

乙逸周書下十五字改大戴禮曾子疾病篇魚

鼃鼃置以淵爲淺而蹙穴其中潛夫論貴忠篇蹙作穿

闕蹙

擲投也

今訂正下補擲者方言楚凡揮棄物謂之敵郭

璞注云敵今汝穎閒語亦然或云擲也大荒東經擲以

雷獸之骨郭注云擲猶擊也擲與擲通

越輕也

乙爾雅越揚也下二十四字改呂氏春秋本味

篇注云越越輕易之貌是越與越同義緇衣引大甲曰

毋越厥命以自覆也若虞機張往省括于厥度則釋越

輕易也言毋輕發汝之政令以自敗也必度於道而行

之若射之省矢括於其度而後釋正見發令之不可輕易也上文云小人溺於水君子溺於口大人溺於民皆在其所褻也故君子不可以不慎也曰在其所褻曰不可不慎皆戒其輕易也鄭注以越爲顛蹙失之荀子非相篇筋力越勁亦謂輕勁也 以越爲過人下補亦

鎔鑿磨也

李鼎祚改虞翻

乙玉篇音余傾下三十二

字改爾雅釋鳥注鸞鵬膏中鑿刀釋文云鑿磨鑿也

孤寡獨也

墨籤云管子入國篇丈夫無妻曰鰥婦人無

夫曰寡取鰥寡而合和之此之謂合獨

賂賈也

乙史記下十二字改晉語云假貸居賄

與賂

通下補字又作舉史記越世家云父子耕畜廢居候時

轉物仲尼弟子傳云子貢好廢舉與時轉貨賁廢舉卽廢居也

矯佺當直也 乙王逸注三字改淮南子說山訓始調弓矯矢王逸高誘注竝 乙襄五年下十八字改考工記弓人於挺臂中有柎焉鄭注云挺直也 乙說文當田相直也七字改管子霸形篇仲父盍不當言當言直言也

曠燠也 乙晏而溫三字改韓子外儲說云雨霽日出視之晏陰之閒

汜汚也 嶠然改嶠焉

甸流七也 墨籤云淮南子主術訓禽獸昆蟲與之陶化

文子精誠篇陶化作變化 乙莊子逍遙遊下三十一
字改漢書董仲舒傳書曰有火復于王屋流爲鳥是流
爲化也

益何也 益曷也改曷益也

農勉也 乙洪範云農下十三字

藏澹也 藏者下補素問長刺節論頭疾痛爲藏鍼之王
冰注云藏猶澹也 藏猶澹也改奧藏猶奧澹也

雛少也 說文作雛下補呂氏春秋仲夏紀注云雛春鷄
也 乙玉篇下七字

秣疏也 適厯是也下補管子地員篇赤墟厯彊肥 李
善注云改補李善尹知章注竝云 厯猶疏也乙猶字

乙古詩下八字

著也 墨籤云華嚴經音義上引廣雅置著也

壁至坡塵也 塵埃也下補玉篇於奚於計二切淮南子

說山訓注云埜堞猶塵翳也翳與壁同說文埜天陰塵

起也義與壁亦相近 乙高誘注三字 齊俗訓下補

注 塵起也下補易稽覽圖云黃之色悖如翹塵 蜀

都賦下補云 敦與埜通改悖敦並與埜通

稽亢當也 古之道也下補王莽量銘云同律度量衡稽

當前人 朱籤云宣十三年左傳晉以衛之救陳也討

焉孔達曰我則爲政而亢大國之討將以誰任我則外

之案亢者當也大國之討謂晉討衛之救陳也言我寔

掌衛國之政而當晉之討不得委罪於他人也前年宋伐陳衛孔達救陳曰若大國討我則外之是其證也杜訓亢爲禦以亢大國之討爲禦宋討陳皆失之

贖聾也 墨籤云易林家人之咸心狂志悖視聽聾穎

帶微束也 是束之義也下補襄十年左傳帶其斷以徇於軍謂束其斷布以徇也 兩股爲纒下補太元眷次七云小子牽象婦人徽猛

爲施也 盡加重罪下補爲者呂氏春秋長利篇注云爲施也今俗語猶云施爲矣

担剝擊也 廣雅作笱下補古辭婦病行云有過慎莫笱笱 剝與扑聲義同下補說文作攴

攻伏也 伏於下也下補諸書無訓攻爲伏者攻當爲敗
字之誤也隸書氏或作互工或作互二形相似故敗誤
爲攻漢李翁析里橋鄙閣頌投致攻堅攻字作致是其
證也淮南子說林訓使工厭竅今木工誤作氏大戴禮
帝繫篇青陽降居江水今本江誤作泚是從工從氏之
字多因形近而譌也敗玉篇音丁禮切敗者伏藏之名
襄二十九年左傳若泝棄之物乃坻伏釋文坻音旨又
丁禮反後漢書馬融傳駭惘底伏李賢注云底伏猶滯
伏也坻底竝與敗通是敗與伏同義王褒四子講德論
雷霆必發而潛底震動潛底猶潛伏也伏與隱義相近
故釋言又云敗隱也論衡感虛篇云夏末政衰龍乃隱

伏卽傳所云物乃坻伏也敗又通作低論衡龍虛篇引左傳作物乃低伏

寶道也 寶者下補檀弓喪人無寶仁親以爲寶鄭注云寶謂善道可守者

銖鈍也 其兵戈乙戈字

伐淹敗也 墨籤云一切經音義引白虎通曰伐者何伐敗也欲敗去之 謂浸漬之下補後漢書安帝紀云秋稼塗可收穫而連雨未霽懼必淹傷

卷第三下

釋詁

庸和也 各本譌作庸改各本皆作庸下補干祿字書庸

俗作庸故譌而爲庸韋昭注周語云庸和用也

戮辱也 古亦同聲下補戮者周官掌戮注云戮猶辱也

沈驥駢止也 墨籤云家語七十二弟子篇公皙哀字季

次今本次譌作沉 駑不行也下補魏阮瑀駕出北門

行云馬樊不肯馳 馬駑不行下補太元元鑑云進欲

行止欲駑 駑與駑同駑下補竝

截對澡治也 整齊而治下補漢啟母廟石闕銘九域少

其脩治少與截通 乙玉篇廣韻竝同六字改宣十二

年左傳其君無日不討國人而訓之杜預注與說文同

治去孳垢下補士虞禮澡葛經帶鄭注云澡治也

綆縮也 亦與綆同下補字又作儒管子宙合篇此言聖

人之動靜開闔誠信淫儒取與之必因於時也淫與盈同儒與縵同盈縵猶盈縮也

蕪素本也 今據以訂正下補後漢書南蠻傳雞羽三十簇簇與蕪通李賢注以爲簇矢失之 所本始也下補說苑反質篇云是謂伐其根素流於華葉

窾空也 窾空也下補管子國蓄篇云大國內款小國用盡

奪敷也 平易之易下補假爲相假易之易 後患之辭下補易乾鑿度云光明四通倂易立節 與夷同義下補假訓爲易者易謂相寬假也桓十三年左傳見莫敖而告諸天之不假易謂天道之不相寬假也僖三十三

年左傳云敵不可縱史記春申君傳敵不可假秦策作敵不可易是假易皆寬縱之意也杜注謂天不借貸慢易之人失之

宗衆也 同人于宗下補逸周書程典解商王用宗讒

荀爽王逸下補孔晁

尙質主也 乙之言掌也四字改者 尙主也下補尙與掌聲近而義同故呂氏春秋驕恣篇遽召掌書新序刺奢篇掌作尙 杜預注云改杜預郭象注竝云 肩批云莊子庚桑楚篇因以己爲質

然爲名成也 踐阼篇云乙云字 乙毋曰胡害下八字改謂其禍將成也楚辭遠遊無滑而魂兮彼將自焚謂

彼將自成也 秦族訓云乙云字 是然爲改謂物自

爲成也下補月令閉塞而成冬呂氏春秋音律篇作
閉而爲冬 名成也下補法言五百篇或性或彊及其
名一也名者成也猶中庸言及其成功一也李軌注以
名爲名譽之名失之

堇少也 蓋廟有存者下補墨子辭過篇云謹此則止
不獨饑饉改勤

屯難也 載重難行乙行字

戮辜也 辜孽矣下補戮者襄二十六年左傳云專祿以
周旋戮也是戮爲辜也

枚收也 鳩救古通用下補救枚形相近故救譌作枚史

記淮南衡山傳江都人救赫漢書作枚赫是其例也

魁覲也 乙史記下十九字改楚策云君不如使人徵要

斬尙而刺之

類比也 類者下補大雅柔箋云類猶比也

更過也 與徑同下補更者史記秦本紀秦兵遂東更晉

地更過也

彌久也 久長也下補逸周書謚法解云彌久也

踈踵迹也 墨籤云段氏說文注云踈當作踈曹憲音匹

迹反集韻云迹或作踈釋獸鹿其跡速速亦當爲速說

文種相迹也 另行有齊師敗績公將馳之蓋駟逐也

條下文

駟逐也 墨籤云北池郡歸德洛水出北蠻夷中入河河
本作涓

紉索也 紉索也下補愒誓注云單爲紉合爲索

卷第四上

釋詁

廢鈇置也 墨籤云莊子徐無鬼篇於是乎爲之調瑟廢

一於堂廢一於室 乙注與鈇通四字改荀子榮辱篇

則君子注錯之當而小人注錯之過也楊倞注云注錯

與措置義同注亦鈇也錯亦措也故廣雅措鈇同訓爲

置矣 其證也改鈇與注通

職業也 墨籤云管子明法解篇孤寡老弱不失其所職

據定也 乙釋名下十字改襄九年穀梁傳恥不能據鄭
也言諸侯不能定鄭也史記白起傳趙軍長平以按據
上黨民按據猶安定也鹽鐵論繇役篇云四支強而躬
體固華葉茂而本根據

石擲也 乙新書二字補史記王翦傳云方投石超距漢
書甘延壽傳云投石拔距絕於等倫石者擲也投石猶
言投擲距如距躍三百之距應劭以拔距爲超踰司馬
貞以超距爲跳躍皆是也投石超距投石拔距皆四字
平列石亦投也距亦超也超亦拔也應劭云投石以石
投人也劉逵注吳都賦云拔距謂兩人以手相案能拔
引之也皆非是賈子

襞結誦也 乙皆詰屈之意也六字改高誘注西周策云

山形屈辟狀如羊腸 墨籤云易林姤之豫云暨屈復

伸 言詰屈也下補月令云蚯蚓結

緣循也 乙急就篇下二十一字改列御寇篇緣循偃快

困畏不若人郭象注云緣循仗物而行者也韓詩外傳

緣理而行說苑雜言篇緣作循

襞表也 臣請爲襞下補高誘注云襞表也新序義勇篇

襞作表 曹大家及高誘注改曹大家注與高誘同

乙竝云襞表也五字

奧藏也 乙之言幽也下二十二字補者 厥民奧下補

老子道者萬物之奧河上公注云奧藏也

搗舒也 其辭句失之下 補張衡思元賦離朱脣而微笑
兮亦以離爲搗也

竊私也 乙王逸下十字改呂氏春秋知士篇注云竊私
也

膚傳也 乙晉語下十五字 乙鄭眾注下十五字改鄭
司農云旅讀爲旅子泰山之旅謂九人傳辭後鄭讀爲
鴻臚之臚臚陳之士冠禮旅占古文旅作臚臚旅古
通用襄十四年左傳史爲書誓爲詩工誦箴諫大夫規
誨士傳言庶人誨商旅于市杜預注云旅陳也陳其貨
物以示時所貴尙引之云旅讀鴻臚之臚陳言也傳言
也晉語風聽臚言於市韋昭注云臚傳也采聽商旅所

傳善惡之言是也周語云庶人傳語此傳云士傳言竝
與臚言同義韋注庶人傳語云庶人卑賤見時得失不
得達傳以語士也杜注士傳言云士卑不得徑達聞君
過失傳告大夫然則商人亦卑賤不能徑達故傳言於
市以待上之風聽而已漢書賈山傳云史在前書過失
工誦箴諫瞽誦詩諫公卿比諫士傳言諫過庶人誦於
道商旅議於市彼文皆取此傳爲之而末云商旅議於
市則是以旅爲商殆由誤讀傳文而然然於於市之上
增一議字亦足證商人之以言諫而非以貨諫矣

愛人仁也 墨籤云方言十凡言相憐哀九疑湘潭之間
謂之人兮 人卽仁也下補穀梁春秋莊元年夫人孫

于齊傳云孫之爲言猶孫也諱奔也接練時錄母之變始人之也錄亦謂閔錄之也人之者仁之也謂於練時閔錄夫人之不與祭於是始仁之也公羊傳云夫人固在齊矣其言孫于齊何念母也彼言念母此言人之其義一也范甯謂始以人道錄之非是

遼逋避也

乙史記衛將軍傳下二十四字

字亦作犁

下補史記南越傳犁且城中皆降伏波犁一作比漢書作遲是遲犁二字竝與比同義 乙僖二十三年下三十字改史記晉世家重耳謂其妻曰待我二十五年不來乃嫁其妻笑曰犁二十五年吾冢上柏大矣義亦同也 去稽畱下補太元奕測云縮失時坐逋後也

憚吝愧也 很亦恨也下補楚辭九章懲連改忿兮抑心
而自強連當從史記屈原傳作違違恨也言止其恨改
其忿也王逸注以連爲畱連失之 吝恨惜也下補屯
六三往吝馬融注云吝恨也

嬾斲琨齊也 所以爲噴也下補太元元規云噴以牙者
童其角 噴與嬾通噴下補竝 乙今人狀物下十三
字改荀子君道篇云其知慮足以決疑其齊斲足以距
難是斲爲齊也 竝與琨同下補褚少孫續滑稽傳駟
牙者其齒前後若一齊等無牙故謂之駟牙索隱云以
有九牙齊等故謂之駟牙猶駟騎然也駟與琨亦聲近
而義同

病苦也 人極于病下補病猶苦也故呂氏春秋貴卒篇
皆甚苦之高誘注云苦病也

卷第四下

釋詁

嚙聲也 乙周天大象賦下十三字

颺風也 劉逵蜀都賦蜀改吳

緜紉微也 顧命云上補大戴禮文王官人篇微忽之言
忽亦微也盧辯注云謂微細及忽然之語失之 之微
德也下補宋玉小言賦云纖於毳末之微蔑

宋靜也 乙淮南子俶真訓云虛無寂寞十一字改呂氏
春秋審分覽云意氣得遊乎寂寞之字

糞春也 墨籤云孫穀古微書引春秋說題辭云孔子言
曰七變入曰米出甲謂磴之爲糲米也春之則粃米也
師之則盞米也著之則穀米也又渠擇之暘嗟之則爲
晶米

巉巖岑高也 乙淮南子覽冥訓下十五字 墨籤云管
子宙合篇陵岑巖

刑到也 刑到也下補刑與到古同聲而通用史記淮南
厲王傳令從者魏敬到之漢書到作刑

奕容也 容也下下補賈子道術篇云包眾容易謂之裕
荀子非十二子篇遇賤而少者則脩告導寬容之義韓
詩外傳容作裕

跌差也 跌作失下補荀子王霸篇云楊朱哭衢塗曰此夫過舉踴步而跌千里者夫

揄脫也 轉爲悅矣下補太元格次三裳格繫鉤渝范望注云渝解也渝與揄義亦相近

繼饒也 字書溫有兩義溫改燭

低舍也 乙低讀爲氏下六十七字改低者楚辭招魂軒竦既低王逸注云低屯也屯亦舍也九章邸余車兮芳林王注云邸舍也邸一作低

抗絳縣也 聲相近也下補僖元年公羊傳云於是抗軻經而外是抗爲縣也 乙者楚辭九章下十九字改與挂通

騫馱長也 墨籤云文子上仁篇不掩羣而取馱

倚因也 與因同義下補老子禍兮福之所倚河上公注

云倚因也

必救也 與救同義下補必當爲密繫辭傳云君子慎密
而不出是謹救之意也字通作宓蜀秦宓字子勅勅與
救通論衡問孔篇云周公告小材勅大材略勅謂密也
略謂疏也或曰

欠貧也 欠爲貧也下補莊子讓王篇內省而不窮於道
呂氏春秋慎人篇窮作疚窮與貧義相近

燿也 謂燭盡望乙望字下補檀弓釋文引管子作卽

望卽竝

蔓莖也 草木改百草 宛歿貌下補淮南子俶眞訓形
傷於寒暑燥溼之虐者形苑而神壯高誘注云苑枯病
也

輦低也 輦輦竝通下補樂記云武坐致右憲左致亦與
輦通憲與軒通

卷第五上

釋言

曼無也 同訓爲無也下補無之轉爲曼猶燕菁之轉爲
蔓菁也

廩治也 乙廩曹憲下全注改桓十四年公羊傳注云廩
者釋治穀名

滴灑礎也 墨籤云四民月令引農家諺云上火不落

水滴灑

與如也 乙王曰今之下二十一字 皆訓爲當也下補

史記匈奴傳單于自度戰不能如漢兵漢書如作與

悅反也 詭反也下補韓子詭使篇云下之所欲常與上

之所以爲治相詭 乙漢書武五子傳下十一字

蘇宮也 通作寤下補楚辭九章蘇世獨立王逸注云蘇

寤也

跣躄也 乙漢書下一百三十字

譏諫怨也 與譏刺同意下補襄二十七年左傳伯有賦

鶉之賁賁趙文子告叔向曰伯有志誣其上而公怨之

以爲賓榮怨亦謂譏刺也

竈造也 與造通下補吳越春秋夫差內傳勒馬銜枚出火於造卽吳語所謂係馬舌出火竈也

已紀也 墨籤云桓二年穀梁傳已卽是事而朝之范甯注云已紀也

馮登也 之次序下補荀子宥坐篇百仞之山而豎子馮而游焉韓詩外傳馮作登

摻捋也 義竝相通下補爾雅流求也張衡思元賦舊注摻求也是摻流古通用

蹶蹠也 趣蹠也下補史記夏侯嬰傳云漢王常蹶兩兒欲棄之 乙說林訓下十三字

遂育也 遂作育下補齊語犧牲不略則牛羊遂管子中

匡篇遂作育

任保也 說文上補周語亹亹怵惕保任戒懼任亦保也

保任戒懼四字平列 其父之勞下補是其證韋昭訓

任爲職失之

應受也 乙爾雅下全注改引之云康誥應保殷民應受

也周頌賚篇云我應受之襄十三年左傳云應受多福

周語叔父實應且憎韋昭注云應猶受也楚辭天問鹿

何膺之王逸注云膺受也膺與應通應保卽膺保也周

語云膺保明德是也膺保猶受保也士冠禮字辭云承

受保之是也或言承保洛誥云承保乃文祖受命民承

亦受也傳云上以應天下以安我所受殷之民眾戾於
經文矣

禘祜也 乙祜集韻下全注改禘當爲禘祜當爲祜說文
禘幘也幘幫也祜衣衿也衿祜也徐鍇引字書云衿補
剝袞也是禘與祜皆幫之異名祜譌爲祜又譌爲祜耳
集韻類篇竝云禘祜也是其證

淫游也 乙曲禮下全注改王逸注招魂云淫游也管子
明法篇不淫意於法之外尹知章注與王逸同說苑反
質篇丹朱傲虐好慢淫卽皋陶謨所謂慢遊是好敖虐
是作也遊與游同

敗隱也 乙襄二十九年下全注改說見卷三攻伏也下

蓋黨也 補注云寶應朱氏武曹云昭二十一年左傳君子不蓋不義

厝央也 又作巨下補詎 古辭下補長安有狹邪行云 調弦未詎央

非違也 墨籤云昭元年左傳云小國爲彙大國省穡而用之其何實非命言不敢違命也故杜注云何敢不從命

卷第五下

釋言

免墮也 乙未詳改諸書無訓免爲墮者免當爲𠄎𠄎𠄎 陷字也說文本作𠄎隸或作𠄎與免字上半相似因譌

而爲免百今通作陷說文陷高下也一曰侈也又云墮
隊下也韋昭注魯語云陷墜也玉篇陷墮也廣韻陷入
地墮也淮南子原道訓云先者墮陷則後者以謀是陷
與墮同義

謂指也 乙指而言之下全注改萃嚴經音義引漢書音
義云謂者指趣也

吳跌也 天文志作跌下補太元將次六日失烈烈竝字
異而義同

資操也 資與齎通上補考工記或通四方之珍異以資
之喪服四制資於事父以事君而敬同鄭注竝云資操
也

徇營也 乙眾經音義下十四字改漢書賈誼傳貧夫徇財應劭注云徇營

乍暫也 詳卒也下補襄二十九年公羊傳今若是進而

與季子季子猶不受也進亦與乍同

酌漱也酌改酌 乙未詳改各本酌譌作酌錢氏晦之云酌當爲酌說文酌少少飲也玉篇酌余振切酌同上廣韻酌酒漱口也案士虞禮少牢饋食禮注並云古文酌爲酌特牲饋食禮注云今文酌爲酌酌皆當爲酌顏師古注漢書賈山傳云酌者少少飲酒謂食已而蕩口也念孫案士昏禮酌酌主人鄭注云酌漱也酌之言演也安也漱所以絜口且演安其所食酌與酌同此酌訓爲

漱之明證也今訂正

貳汙也 乙貳當下全注

貳然也 乙未詳改公羊春秋莊二十三年公會齊侯盟于扈傳云桓之盟不日此何以日危之也何危爾我貳也何休注云莊公有汙貳之行是貳訓爲汙也下文云魯子曰我貳者非彼然我然也注云非齊惡我也我行汙貳動作有危故日之也據此則傳云非彼然我然也者猶言非彼寔使然乃我寔使然耳非訓貳爲然也此云貳然也蓋誤會傳意

律率也 乙中庸下七字改爾雅

菽蓀也 叢生曰蓀下補太平御覽引通俗文云生茂曰

葆

箋云也 乙未詳改諸書無訓箋爲云者云疑志字之誤
說文箋表識書也識與志古字通草書云字作志字
作志二形相近而誤

譏譴也 乙譏通作幾下全注改隱二年公羊傳此何以
書譏何休注云譏猶譴也

柰那也 則曰柰下補淮南子兵略訓云唯無形者無可
柰也 乙是也二字

楊揚也 乙楊當作陽下全注改臧氏在東云尙書禹貢
周禮職方氏爾雅釋地凡揚州字舊本皆從木佩觿云
楊柳也亦州名又云按禹貢淮海惟揚州正義云江南

其氣燥勁厥性輕揚則非當從木據此則郭氏所見尙書尙從木旁也漢曹全碑兗豫荆楊字亦從木隸釋載石經魯詩殘碑唐風揚之水字作楊王風揚之水釋文曰揚如字激揚也或作楊木之字非然藝文類聚引王風太平御覽引唐風則皆作楊之水與陸氏所見本正合不得議其非矣李巡注爾雅云江南其氣躁勁厥性輕揚故曰楊州毛詩以激揚訓楊李巡以輕揚訓楊皆可爲廣雅楊揚也之證 墨籤云文八年左傳晉解揚史記十二諸侯年表作解楊衛世家莊公揚十二諸侯表作楊襄三年晉侯之弟揚千古今人表作楊干案此籤旁有朱書存以備考不必補入八字

匪彼也 乙四月篇下一百三十八字

拊抵也 抵掌之抵下補晉書音義引字林云抵側擊也

之爾反 抵掌而言下補太元翁上九擲其角維用抵

族范望注云抵擊也釋文云抵音紙 後漢書下補太

元

毓長也 乙邶風下四十三字改大雅生民篇載生載育

毛傳云育長也

毓稚也 乙豳風下三十八字 漠怕也下下補引之云

堯典教胄子說文及周官大師樂注並引作教育子史

記五帝紀作教穉子案育子穉子也育字或作毓通作

鬻又通作鞠邶風谷風篇管育恐育鞠鄭箋解管育云

育稚也正義以爲爾雅釋言文今爾雅育作鞠郭璞音義云鞠一作毓幽風鳴鳶篇鬻子之閔斯毛傳云鬻稚也釋文鬻由六反徐居六反是育鞠同聲同義古謂穉子爲育子或曰鞠子堯典之育子卽幽風之鬻子亦卽康誥所謂兄亦不念鞠子哀顧命所謂無遺鞠子羞者也王制注引尙書傳云年十五始入小學十八入大學內則云十有三年學樂誦詩舞勺成童舞象是入學習樂在未冠之時凡未冠者通謂之穉子或曰育子故曰命女典樂教育子西漢經師如夏侯陽必有訓育子爲穉子者故史公以穉代育蓋有所受之也大司樂釋文云育音胄是育胄古同聲作胄者假借字耳逸周書

大子晉篇人生而重丈夫謂之胄子胄子成人能治上官謂之士亦謂未冠者爲胄子也自馬注訓胄爲長鄭王訓胄子爲國子後人咸用其說而史記之教穉子遂莫有能通其義者矣

意疑也 乙意者下一百三十七字改及魯靈光殿賦注引廣雅竝同漢書文三王傳於是天子意梁顏師古注云意疑也韓子說疑篇上無意下無怪呂氏春秋去尤篇人有亾鈇者意其鄰之子史記張儀傳楚相亾璧門下意張儀意皆謂疑也陳丞相世家項王爲人意忌信讒謂疑忌也荀子賦篇暴至殺傷而不億忌億與意同喝嘶也 與喝同下補莊子庚桑楚篇兒子終日嗥而噓

不嘖嘖崔謨本作噉

卷第六上

釋訓

衍衍和也 和樂之貌下補漢成陽令唐扶頌衍衍闐闐
衍衍卽侃侃也

曠曠大也 乙荀子下十四字改莊子天道篇云廣廣乎
其無不容也

晰晰明也 明星晢晢下補通作逝太元符次六獨符逝
逝范望注云逝逝明也

汲汲惺惺也 乙汲與汲通四字改莊子盜跖篇狂狂
汲汲釋文云汲本亦作汲賈子匈奴篇云人人汲汲唯

恐其後來至也竝字異而義同 與佺通下補莊子狂
狂汲汲 惟與佺亦惟改竝乙亦

葵葵孝也

光耀於天下補後漢紀靈帝紀崇有虞之

孝昭蒸蒸之仁

與禰通下補巴郡太守張納碑膺大

雅之淑姿脩蒸蒸之孝友

移家語六本篇下二十一

字於不違仁下改魏志甄皇后傳注引三公奏云至孝

蒸蒸通於神明

偃蹇天橋也

又作矯下補淮南子脩務訓云龍天矯燕

枝拘

崢嶸澗冥也

乙楚辭下十八字改論衡道虛篇云其書

澗冥奇怪

躑躅猶豫也

曰猶曰豫下補管子君臣篇云民有疑惑

貳豫之心

從容舉動也

從容之證下補舉動謂之從容跳躍謂之

踈踴聲義竝相近故踈踴或作從容新序稌事篇云元
媛居桂林之中峻葉之上從容游戲超騰往來從容卽
踈踴也 聲意竝相近竝改亦

軫輓轉戾也

乙緝合諸三字

乙續漢書下五十八字

改說苑敬慎篇曾子有疾曾元抱首大戴禮曾子疾病
篇抱首作叩首是抱叩聲相近故抱首之抱或作叩

揚摧無慮都凡也

訓爲都凡也凡改凡下補張晏注漢

書古今人表云略舉揚較以起失謬較與摧通

萬俗

是也下補中山策云商敵爲資敵亦與推通 續漢書
律歷志歷改厯 猶都凡耳下補鄭注儒行云安之言
無也 無慮之轉下補爲勿慮大戴禮曾子立事篇云
君子爲小由爲大也居由仕也備則未爲備也而勿慮
存焉勿慮卽無慮言居家理則治可移於官道雖未備
而大較已存乎此也盧辯不曉其義乃以勿慮存爲不
忌危其失也鑿矣又轉之爲摹略墨子小取篇摹略萬
物之然論求羣言之比摹略者總括之辭猶言無慮也
又轉之 乙莫絡孟浪無慮六字改無慮勿慮摹略莫
絡孟浪

卷第六下

釋親

姓子也 振振公姓下補特牲饋會禮子姓兄弟如主人之服鄭注云言子姓者子之所生

妻謂之孀 下妻也下補歸妹六三歸妹以須釋文云須荀陸作孀陸云妾也

踦脛也 長腳者下補管子侈靡篇云其獄一踦腓一踦屨而當外

卷第七上

釋宮

廊舍也 墨籤云韓非子有度篇遠在千里外不敢易其辭勢在郎中不敢蔽善飭非外儲說左上於是日郎中

莫衣紫其明日國中莫衣紫三日境內莫衣紫秦策今
臣處郎中

窺窟也 言複也下補錢氏晦之云究疑當作究玉篇究
五九切究窟也

治甄甄也 墨籤云晏子春秋諫篇景公令兵搏治當臘
冰月之閒而寒民多凍餒而功不成隋書百官志太府
寺有掌治甄官

檻牢也 墨籤云呂氏春秋順說篇云管子得於魯魯束
縛而檻之

糜機柴也 化導宜暢下補糜謂之機亦謂之閣爾雅所
以止扉謂之閣郭注云門辟旁長糜也漢博陵太守孔

彪碑有五官掾劉機字口閣義取諸此也

椽也 義亦相近也 下補引之云周官掌固掌脩城郭

溝池樹渠之固渠與椽同謂籬落也因樹木以爲籬落
故曰樹渠司險職云設國之五溝五涂而樹之林以爲
阻固鄭注云樹之林作藩落也是其證矣城郭爲一類
溝池爲一類樹渠爲一類賈疏以爲渠上有樹失之

術隊陌道也 外爲阡陌下補墨子明鬼篇道路率徑率

與術通 乙文十六年傳下六十六字改商子算地篇
都邑遂路遂亦與隧通 東西曰陌下補管子四時篇

作干伯

趙犇也 或爲醮史記下補高祖紀襄城無遺類遺一作

噍

廟天子五 墨籤云呂氏春秋諭大篇商書曰五世之廟
可以觀怪尚書後案第八咸有一德七世之廟可以觀
德下引證甚詳此條須改

案尚書後案辨曰呂覽卷十三諭大覽引商書云五
世之廟可以觀怪萬夫之長可以生謀莫知爲何篇
語也作僞者取其文而加以改竄不知七廟始于周
夏商以前未有也王制云天子七廟三昭三穆與太
祖之廟而七鄭云此周制七者太祖及文王武王之
祧與親廟四太祖后稷殷則六廟契及湯與二昭二
穆夏則五廟無太祖禹與二昭二穆而已鄭據禮緯

稽命徵及鉤命決云唐虞五廟親廟四與始祖五禹
四廟至子孫五殷五廟至子孫六周六廟至子孫七
故七廟獨周制爲然蓋禹之時祇有高祖以下四親
廟至子孫并禹則五矣湯之時祇有契及四親至子
孫并湯則六矣周文王之廟不毀以爲二祧始祖之
廟亦不毀則爲七矣此不易之論也書云五世之廟
此湯之時也王肅議禮必反鄭元此僞書及傳正王
肅之徒所爲故宗其說

獄犴也 乙亾犴不可下七字 犴獄也下補荀子宥坐

篇獄犴不平 乙云獄犴不平五字改作犴 乙或但
謂下二十七字

卷第七下

釋器

甝甝罍甝甝也 大毳爲甝下補晉書五行志建興中江南謠歌曰訶如白坑破合集持作甝揚州破換敗吳興覆甝甝坑與甝同 墨籤云大宗師皆在鑑搯之間耳崔誤注搯當作甝 又籤云穆天子傳二天子乃賜之黃金之罍三六 又作擔下補又作檐呂氏春秋異寶篇祿萬檐高琇注云萬檐萬石也

案謂之塲 乙漢書外戚傳下十七字改史記田叔傳云高祖過趙趙王張敖自持案進食

椀孟也 與椀同下補賈子時變篇云母取瓢椀箕帚

盞杯也 栝匱也下補太平御覽引風俗通義云吳郡名酒杯爲盞說文

楛謂之鏤 兵略改精神 奮僖鏤改揭鏤雷

犧象罇也 乙其不可信一也下一百八十二字改且莊子云百年之木破爲犧尊淮南子云百圍之木斬而爲犧尊則古人以木爲犧尊明矣今魯郡所得犧尊在地中七百餘年而完好可辨以木爲之乎抑以金爲之乎以木爲之則不能經七百年而不壞以金爲之則又與莊子破木爲尊之說不合無一可者也

紈繅素也 墨籤云聘禮賄用束紡鄭注云紡紡絲爲之今之縛也

麴塵綵也 亦染黃也下補易稽覽圖云黃之色悖如麴

塵

襟袂謂之襍 襍領也襍改襍

繞領帔帶也 墨錄云段注說文七下說繞領帔之義甚

是當據改

案說文解字段氏注云方言繞矜謂之帔廣雅本之

曰繞領句帔句帔也矜領今古字領者劉熙云總領

衣體爲端首也然則繞領者圍繞於領今男子婦人

披肩其遺意劉熙曰帔披也披之肩背不及下也蓋

古名帔因農方言曰帔若常則曰下帔言帔之在下

者亦集眾幅爲之如帔之集眾幅被身也如李善引

梁典任昉諸子冬月著葛巾帔練裙白是上下三物
水經注淮南王廟安及八士像皆羽扇裙帔巾壺枕
物一如常居亦帟帔竝言自釋名裙系下帔系上後
人乃不知帔帟之別擅改說文矣

衽袖也 亦袂也下補管子弟子職篇云攝衽盥漱又云
振衽埽席趙策云攝衽抱几

稍謂之衽 稍衣衽也下補太元元規云坐稍爲衣襜幅
爲裳

稍謂之衽 乙漢書宣帝紀下十三字改呂氏春秋明理
篇道多衽襪高誘 賈誼傳上補宣帝紀作襪衽
鞞鞞屨也 墨籤云說文鞞鞞鞞沙也鞞沙與鞞鞞同

幃謂之幃 獨穿也下補墨子備城門篇云城上之備渠
礮藉車

徽幃幃幃也 呂絳徽乙徽 給事者衣乙衣 以絳徽

帛謂之幃乙徽帛下補著背 織文織徽織也三織字

竝改識 幃織識乙織

幃謂之幃 墨籤云商子賞刑篇云贊茅岐周之粟以賞

天下之人不人得一幃韓子外儲說左篇云猶羸膝而

履躡秦策羸膝履躡負書擔橐趙策羸膝負書擔橐

繩索也 大索也下補魏志王昶傳兩岸引竹繩爲橋繩

與繩同

絡也 墨籤云易林訟之蠱衣敝如絡

輻柳車也 喪車明矣下補史記齊世家桓公載溫車中
馳行溫與輻通 乙下篇二字改記

鎗也 穀耑鎗也下補士喪禮記云主人乘惡車木鎗
輦也 乙四民月令下十六字改管子度地篇土車什一
雨輦什二尹知章注云車輦所以禦雨故曰雨輦

卷第十下

釋蟲

蚴蚴蝮也 蛸螻也下補楚辭九思云蚴蚴兮噍噍
蚴蚴蛸螻也 一名蜺螻螻改螻

杜伯嘽也 謂之嘽下補崔瑗草書勢云絕筆收勢餘縱
糾結若杜伯撻毒絲蠟

景天螢火燐也 墨籤云段氏說文彘字注云詩傳燐熒

火也熒火謂其火熒熒閃賜猶言鬼火也陳思王曰熠
燿宵行章句以爲鬼火或謂之燐章句者謂薛君章句
是則毛韓古無異說毛詩字本作熒或乃以釋蟲之熒
火卽炤當之且或改熒爲螢改燐爲燐大非詩義

馬蠓馬虻也 馬蠓也下補說苑雜言篇馬斲折而復行
者何以輔足眾也

蟾蜍也 誤耳螳蜍下乙今字補有斧蟲故一名斲父江
東呼爲石蜍石斫聲相近今高郵人或謂之斲蜍又
乙聲之轉也四字

蟪蛄也 墨籤云管子七臣七主篇苴多騰慕山多蟲

蠶幕與蟒同百騰卽幕騰

卿蛆吳公也 墨籤云王逸九思哀感卿蛆兮穰穰注將

變貌

引無也 墨籤云漢益州太守高頤碑游心典籍字作無

虎王帽也 墨籤云帽令虎申蛇令豹止手抄本有之

沙蝨蝦蟇也 乙是其情狀也改故晉車永與陸雲書云

鄴縣既有短弧之疾又有沙蝨害人

釋魚

鮓鮓鮓也 墨籤云史記伍子胥傳縣吳東門之上正義

曰東門鮓門謂鮓門也鮓音普姑反鮓音覆浮反越軍

開示浦子胥濤盪羅城開北門有鮓鮓隨濤入故以名

門顧野王云鱧魚一名江豚欲風則涌也

鱧鱮也 似鱧短小也下補華陽國志漢中志云度水有
二源清水出鱧濁水出鮒

無角曰宛龍 墨籤云白帖九十五引此無角曰螭龍下
有未升天曰蟠龍 欲大口則藏於天下省批云手抄
本大字下亦係則字此乃重寫則字

釋鳥

鵬鵬也 鵁作鵁下補中庸鵁飛戾天爾雅鵁鳥醜釋文
竝云鵁字又作鵁 本又作鵁下補史記穰侯傳魏將
暴鳶韓世家鵁作鵁 墨籤云段以鵁爲夏小正鳴弋
之弋又以鵁爲鵬之俗字大謬 又籤云隸書從弋之

字或省從弋曹全碑威牟諸費攻城堅戰是也此可爲
芎字作芎之例又李劫夫人碑世有皇兮氣所裁吳仲
山碑感癒張遷碑開定畿寓亦省戈作弋

陽鷲鷲也 集韻鷲小鷲也改玉篇鷲鷲也 鷲野鳥也
鳥改鷲 乙索隱引劉下二十六字

鳩鳥其雄謂之運日 離騷注下補章昭晉語注竝 乙
羽有毒可殺人六字

翼文曰順 墨籤云白帖九十四引山海經作翼文曰禮
背文曰義 又籤云論衡講瑞篇引禮記瑞命篇云雄
曰鳳雌曰皇雄鳴曰卽卽雌鳴曰足足

鳳皇屬也 墨籤云論衡講瑞篇王鳥之記四方中央皆

有大鳥其出眾鳥皆從小大毛色類鳳皇

鷓怪鳥屬也 墨籤云玉篇鷓亾俱切雀也廣韻鷓鳥名

雀屬卽廣雅之鷓雀

釋獸

狻狁也 墨籤云狻或作狻魏志東遼傳夫餘大人加狐

狸狻白黑貂之裘又云出貂狻蓋狻亦狐狸之屬可以

爲裘故傳以狐狸狻並言之狻或譌作豹魏志鮮卑傳

注引魏書鮮卑有貂豹獬子皮毛柔蠕故天下以爲名

裘後漢書鮮卑傳同又東遼傳夫餘出貂豹字皆作豹

蓋狻從宀聲廣韻宀而隴切或作內其形與內相似故

狻字譌而爲豹李賢注後漢書不知釐正乃音奴八反

云似豹無前足又云豹猴屬也案爾雅狃無前足本又作豹女滑反郭璞云似狗豹文又用字林說云似虎而黑不言皮可爲裘亦不以爲猴屬李注非也又案廣韻豹獸名無前足說文作狃女滑切又云似狸蒼黑善捕鼠依女滑之音則爲爾雅之豹依似狸之解則又爲倉頡篇之豹矣蓋豹狃混已久爲韻書者莫能辨正而誤合之不知似狸之獸其字作狃作豹不作豹音余救切不音女滑切

猓豕也 乙猓豕也下一百十字改猓疑當作殺說文云上谷名豬殺從豕役省聲玉篇音營隻切猓字俗書作猓兩旁皆與殺相似世人多見猓少見殺故殺字譌

而爲猓此言豕之通名下文方釋豕之牝牡下既有猓
猓之文則此文不得作猓也

媿兔子也 弱小之稱下補小雅采薇篇薇亦柔止毛傳
云柔謂脆脆之時釋文媿音問 聲義下補竝

獫狁也 去勢曰獫下補虞翻云劇豕稱獫劇與犒同獫
字或作獫韓子十過篇云豎刁自獫以爲治內

鼯鼯 鼯鼠矣下補北戶錄引廣志云鼯蛉鼠毛可以爲
筆 鼯蛉與鼯鼯同

鼯鼠 墨鏡云爾雅釋獸釋文引博物志云鼯鼠之最
小者或謂之耳鼠

釋罍

白馬朱鬣駮

墨籤云爾雅釋言釋文引廣雅曰白馬朱

鬣曰駮與今本同蓋三家詩說不必改駮續漢書禮儀志立秋之日乘輿御戎駮白馬朱鬣卽月令之乘白駮也

金喙騷

乙開元下二十五字改武帝紀更黃金爲麟

趾裏蹠應劭注云古有駿馬名要裏赤喙黑身一日行

馱

馱馱爲獻下補列女傳辯通傳云馱馱生七日而

超其母

索隱云云改引發蒙記下補云乙列女

傳下十字

郭判丁犖

墨籤云判當爲犖集韻犖苦禾切引博雅郭

犖牛屬玉篇廣韻竝云犖牛無角也桓譚新論作郭椒

乃科之誤蓋科作耕與隸書椒字作𣎵者相似故誤爲
椒也淮南子說山髡屯犁牛旣科以橢段氏說文犂字
注引此二書謂科椒同韻非也

此廣雅疏證始刻成後覆加勘定之本朱墨燦列凡所刪
補無慮四百餘條皆精詳確當卷五釋言酌漱也下朱筆
補疏有念孫案三字知爲石臞先生親自攷訂者其補自
文簡者則冠以引之曰卷七釋宮廟天子五下墨籤云尙
書後案第八成有一德七世之廟可以觀德引證甚詳此
條當改釋器繞領帔幫也下墨籤云段氏說文七下說繞
領帔之義甚是當據改則是待改而未改者八九兩卷獨
無一字則是待校而未及校者統觀諸條的係先生親自
脩定之藁嗣是曾否補完曾否再刻或祇此本或尙有傳
錄之本無從徵考不能臆測阮文達刊入學海堂經解揚
州淮南書局光緒重鈐悉据原疏本似都未見此冊無論

世間有無第二本而此冊信可寶貴已獨不識何以流傳
在外入清河汪氏所藏有汪氏珍藏桃花潭水二印汪葵
田先生名汲春園先生名椿祖孫咸精經學有著述雖不
若高鄧王氏父子之盛亦學人也書賈獲自汪裔索賈頗
昂余初見謂朱墨爲汪氏所加繼而諦審始辨是王家故
物直端午得錢極艱迺齎米薪力購得之暇當遍質通
人設法流布儻是孤本斷不敢自我韜其寶氣也光緒庚
子五月古襄平黃海長謹識

李崇賢注文選凡六易稿朱子四書章句集注晚年要有
改定古人著述不厭精審如此石臞先生廣雅疏證刊成
之後手自刪補當由卷帙繁重不及重鐫洵秘笈也家君
得此書擬仿盧抱經羣書拾補例彙輯別行爰屬王君叔
如編次成帙又獲朱君少如王君覲卿相與校讐繕寫釀
金付梓期與海內博雅共欣賞之其八九兩卷家君謂待
校而未校者嗣迺知原書淪失書賈以他冊配合愒無從
蒐求稍嫌缺憾耳黃信臣埭識